

# IziNtshumayelo zokuSebenzelana ekuZwaneni

58/2015 Intshumayelo ngesonto lokugcina emva komkhosi wobuThathwemunye, ngomhla ka 22. 11. 20

**Egameni likaNkulunkulu onguYise, neNdodana, noMoya oNgcwele.**

Izwi elongamela leliviki lilotshiwe kuLuka 12:35

1. Iculo 305/235

2. **Umkhuleko:** Nkosi, singcwelise ngeqiniso lakho; izwi lakho liyiqiniso. Amen.

3. Izwi lezwi leTestamente elidala lilotshiwe ku-Isaya 65:17-15;

Iphistola ngohlelo lwesibili lilotshiwe kuso isAmbulo 21:1-7;

Ivangeli ngohlelo lwesithathu lilotshiwe kuLuka 12:42-48.

4. Isivumo senkolo: Ngiyakholwa nguNkulunkulu uYise ...

5. Iculo 303/230

6. Umkhuleko wakhe ofundayo intshumayelo

7. **Ivangeli** ngohlelo lokuqala lilotshiwe ku-Mathewu 25:1-13, lithi: Khona umbuso wezulu uzakufaniswa nezintombi eziyishumi ezathatha izibani zazo, zaphuma ukuyohlangabeza umyeni. Kepha eziyisihlanu kuzo zaziyiziwula, neziyisihlanu zazihlakaniphile. Ngokuba eziyiziwula zithatha izibani kaziwaphathanga amafutha. Kodwa ezihlakaniphileyo zaphatha amafutha ezitsheni kanye nezibani zazo. Umyeni esalibele, zozela zonke, zalala. Kepha phakathi kobusuku kwamenyezwa ukuthi: Nangu umyeni; phumani niye kumhlangabeza! Khona zavuka lezozintombi zonke, zalungisa izibani zazo. Eziyiziwula zase zithi kwezihlakaniphileyo: Sipheni amafutha kwawenu, ngokuba izibani zethu ziyacima. Kepha ezihlakaniphileyo zaphendula zathi: Qha, funa angasaneli thina nani. Okungcono hambani niye kwabathengisayo, nizithengele. Zisaya kuthenga, wafika umyeni. Ezazilungele zangena naye emshadweni; kwavalwa emnyango. Ngasemuva zafika nezinye izintombi, zathi: Nkosi, nkosi, sivulele. Kepha waphendula wathi: Ngiqinisile ngithi kini: Anginazi. Ngakho lindani, ngokuba anilwazi usuku nehora. Amen.

8. **Intshumayelo:** Bandla elithandekayo leNkosi uJesu Kristu, namuhla sekulisonto lokugcina emnyakeni webandla. Umnyaka wonke weNkosi udlulile futhi. Ngiyakhumbula ukugcina kwezikhathi nokugcina kwezinto zonke. Yebo, nokuphela kwezinsuku zami kuyasondela. Ngiyazindla ngosuku lwami lokugcina. Ngiyamungunya ukufa kwami. Ngiyandwemela okuzayo, lokhu okuzovela.

Lomfanekiso wesonto lanamuhla ufuna ukungisiza ukuba ngikwenze lokhu ngokufaneleyo. Lelivangeli elihle liyangivusa ukuba ngingalindeli-ize. Angithi, sonke siyalinda, siyamela, siyabheka. Wonk' umuntu uyalindalinda. Omunye ulindela ithuba, omunye ulindela inhlanhla, omunye ulindela ukuhola okungcono, omunye ulindela ukukhululwa, omunye ulindela ukuphila okuhle okungcono. Umuntu ogulayo ulindela ukusa, ukuphuma kwelanga emva kobusuku obunzima. Umuntu omubi ulindela ithuba lokuganga. Umuntu

olungileyo ulindela ithuba lokusiza nokuthi nokuthi. Angithi, sonke siyalindalinda isikhathi esithize, ithuba elithize, izenzo ezithize, abantu abathize.

Nathi thina-makholwa siyalinda. Kodwa ukhona umahluko omkhulu phakathi kwethu nabanye. Asilindeli ngokungazi, ngokungabaza, ngokuzulazula nje, cha. Asilindeli-ize nje. Kodwa konke ukulinda kwethu kunomgomo. Siyamazi esimlindela yena. Simlindela osihlangabeza. Simlindela osendleleni. Simlindela onquma usuku nehora. Simlindela osithandayo. Simlindela owasimema. Simlindela esimaziyo kahle: uJesu Kristu, iNdodana kaNkulunkulu nomfowethu othandekayo. Ngakho-ke silindela njengabakahlakaniphileyo. Ngakho-ke singalindeli ngengeziwula, angithi?

Umphostoli uPawulu uloba kwabaseEfesu 5 ngokuthi: Ngakho-ke bhekisisani ukuthi nihamba kanjani, kungabi njengabangahlakaniphile kepha njengabahlakaniphileyo, nisebenzise isikhathi ngokwentando kaNkulunkulu. Ngokuba izikhathi zimbi. Ngakho-ke ningabi-yiziwula, kodwa qondani okuyintando yeNkosi. Ake sizihlolisise kahle. Sisamlindela ovela ezulwini noma siyanaka okomhlaba kuphela?

"Khona umbuso wezulu uzakufaniswa nezintombi eziyishumi ezathatha izibani zazo, zaphuma ukuyohlangabeza umyeni. Kepha eziyisihlanu kuzo zaziyiwula, neziyisihlanu zazihlakaniphile. Ngokuba eziyiwula zithatha izibani kaziwaphathanga amafutha. Kodwa ezihlakaniphileyo zaphatha amafutha ezitsheni kanye nezibani zazo. Umyeni esalibele, zozela zonke, zalala." Angithi, siyezwa lokhu. Samenywa sonke. Sabizelwa sonke. Okusho ukuthi umyeni uqobo lwakhe uyasazi thina, uyakwazi wena; uyangazi mina. Wasimema emshadweni. Into nje: Asilazi ihora lomyeni. Asazi ukuthi iNkosi izobuya nini. Kodwa ngiyazi emini nasebusuku ukuthi isikhathi sami sisesandleni sikaNkulunkulu. Ngakho-ke angilahli ithemba. Nginesizungu sokuya emshadweni. UNkulunkulu uhlwanyelile lesisifiso nalelithemba elihle enhliziyweni yami. UNkulunkulu uqobo lwakhe uqinisa, uphilisa, ulondoloza ukukholwa kwami ngezwi lakhe namasakramente akhe angcwele isibiko nesidlo seNkosi. UMoya oNgcwele ugcwalisa inhliziyoyami ngeziphiso zakhe. Uthokozisa abantwana bakaNkulunkulu ngenduduzo yentethelelo. Kanjalo sihamba kahle ngokwenama nangesibindi, kanjalo silala kahle ngokuthula ngaphandle kokudangala, ngaphandle kovalo, ngoba siyazi ukuthi sisezingalweni zomalusi omuhle, osithwala, osigarda thina kuzo izingozi zonke, nakuzo izinhlupheko zalokhukuphila okunzima. Amafutha ezibani asatholakala, we mzalwane. Woza ugcwalise isibani sakho manje isikhathi sisekhona namuhla lapha phambi kwealtare lebandla lakho elithandekayo. Uzothola amafutha ukuba isibani sakho sikhanye, sikhombise nabanye indlela yokuya emshadweni.

Mhlawumbe ukhathele ukulindela iNkosi, udiniwe ukusonta, mhlawumbe ulahlekelwa yithemba, nesibindi, mhlawumbe intokozo ifile ekuphileni kwakho, ukuhleka kwaphela khona emzini wenu, mhlawumbe ulahlekelwa intando namandla okubamba insindiso yakho ngezandla zombili, isibani sokukholwa kwakho siyacimacima siyabhamzela nje. Kuhamba kanje. Nakimi kunjalo ngesinye isikhathi. Mhlawumbe isibani sokukholwa kwakho singcolile, sigcwele ngomule, ngensizi, ngentshede. WOZA! Nginegama elilodwa nje

kuphela: WOZA! Woza namuhla! Woza manje! Woza wamukelwe kabusha emuseni weNkosi, uthethelelwe ngexa kaKristu! Uwamukele amafutha afaneleyo mahalalahalahala. Wamukele umusa phezu komusa. Sukuma asiye khona. Siyavuswa. Siyadonswa. Siyamenywa nguJesu Kristu osithanda kangaka.

"Kepha phakathi kobusuku kwamenyezwa ukuthi: Nangu umyeni; phumani niye kumhlangabeza! Khona zavuka lezozintombi zonke, zalungisa izibani zazo. Eziyiziwula zase zithi kwezihlakaniphileyo: Sipheni amafutha kwawenu, ngokuba izibani zethu ziyacima. Kepha ezihlakaniphileyo zaphendula zathi: Qha, funa angasaneli thina nani. Okungcono hambani niye kwabathengisayo, nizithengele. Zisaya kuthenga, wafika umyeni. Ezazilungele zangena naye emshadweni; kwavalwa emnyango. Ngasemuva zafika nezinye izintombi, zathi: Nkosi, nkosi, sivulele. Kepha waphendula wathi: Ngiqinisile ngithi kini: Anginazi. Ngakho lindani, ngokuba anilwazi usuku nehora." Onezindlebe makezwe. Ngizolinda kangcono uma ngiyazi ukuthi zonke izono zami zathethethelelwa zona, ngilungisile izindaba zami ngomusa weNkosi, akhona amafutha. Ukukhanya kwevangeli kuyakhanyisa mina nomuzi wami. Mayibonge iNkosi! Amen.

9. **Umkhuleko:** Sifundise, Nkosi ukubala izinsuku zethu, sizuze inhliziyo enokuhlakanipha.Amen.

Umkhuleko weNkosi: Baba wethu osezulwini ...

10. Iculo 299/226

Ukuthula kukaNkulunkulu okudlula ukuqonda konke makulondoloze izinhliziyu zenu nemicabango yenu kuKristu Jesu. Amen.

Lentshumayelo ilotshiwe ngo-2009 ngu-K. G. Tiedemann.

Ukucindezelwa nokuthunywa kwezintshumayelo kuyasekelwa yinhlangano ethiwa: Lutheran Heritage Foundation.